

佛言祖语



五分法身，以戒为依；三无漏学，以戒为首。无一如来不具戒体，无一菩萨不修戒度，无一经典不赞戒法，无一圣贤不严戒行。持戒如地，万善由此而生成；持戒如城，魔障藉此而远离。论其超胜，则才沾戒品，便名人世福田；极其指归，则唯佛一人，方名圆满净戒。四级重楼，级级皆圆顿境；八万细行，行行与法界周。若不持戒，纵能习讲坐禅、兴诸福业，皆为魔业，必入魔党。故好心出家者，决须从持戒始。自利利他，法皆成就，舍此通途，更无捷径。问：比丘律藏，本属声闻；梵网戒经，方为大教。今云四级皆圆顿境，则大小奚分？又既称圆顿，则一种已足，何须四级？答：圆人受法，无法不圆。既禀法华开显之旨，一色一香，无非中道，岂有戒法而不圆顿？故《法华玄义》云：开粗者，毗尼学即大乘学，式叉、式叉，即是大乘第一义。光非青黄赤白黑，三归、五戒、十善、二百五十，皆是摩诃衍，岂有粗戒隔于妙戒？戒既即妙，人亦复然，『汝实我子』，即此义也，是名绝待妙戒。噫！由此观之，级级圆顿，其义彰矣。圆顿之法，一多无碍，方成不可思议。若谓一种已足，则华严七处九会，亦可云一处一会已足耶？又问：五戒、十戒、比丘、菩萨，喻如重楼四级，故曰：不受五戒而受十戒，乃至不受比丘戒而受菩萨戒，俱无有是处。是则次第之义昭然，今胡许沙弥受菩萨戒，岂不违越金口诚言？答：重楼之喻，盖是一往明其次第，必欲执之，则优婆塞亦不得受菩萨戒矣。既可许优婆塞，胡独不许沙弥？沙弥乃反不及优婆塞耶？然菩萨戒法，不惟义疏通列七众，而西域诸寺大小各别，岂大乘寺中遂独无沙弥也？又问：禅、教、律三，譬如春兰秋菊，各擅其美，今独以戒为通途，云何从古立为三宗？答：西天四七，无不总持三藏；法流东土，方乃各立门庭。然终不闻真实禅师、讲主或可荡检逾闲者也。凡未学戒者，多畏持戒之难，正坐不知戒法，妄生退委。若学此戒，始知如来大智，曲尽人情，开遮得所，守护非难。